

# Faulo ena leta nugweta me Tesalonaika 'idia

## Leta ana alamani weaqina

Taha 'abaga agona ana wawa Tesalonaika di'we Masidonia 'inaya. Ta Faulo ena luvivila 'inaya mai 'abaga~nana 'inaya ta Ieisu Valena lugaihiea 'idia. 'Inega Ieisu ivetumaqanea 'abo 'ekalesia ive'alea. Faulo ena lugaihi weaqina me Diu ivevoalanea 'inega dena tauya 'abaga Belia 'inaya. 'Abibodanaya Faulo iana Timoti vetunea me Tesalonaika 'idia sabi vyausidi, nuanuana nahalamani aqiaqiea ma'oda itoatoa 'aiqa. Vyausidi gumwala 'inega 'evivi Faulo 'inaya ta vematamagilafuyea taudi me Tesalonaika me edi vetumaqana aqiaqi itoatoa, ta wese veyoluba 'avadi. 'Inega Faulo qaiawa weaqidi ta ena leta ba'e 'wayavia nuanuana nagivewaiwaidi, mana taudi wese vevoalana ilobea edi vetumaqana Ieisu 'inaya weaqina. Ta wese nuanuana nave'itedi Ieisu ena 'evivi mai weaqina, mana vaidi to'ekalesia ivenuana magilafu tola'ai na'ifoqe 'ali'aligidi be wese mayawaidi 'idia mai~nana 'inaya.

## Leta gamona

- 1:1 Vematamagilafu be venoqi
  - 1:2-3:13 'Awahaqiaqi be awatubo
  - 4:1-12 Vona waiwaina ilivu aqiaqi otaqina weaqina
  - 4:13-5:11 Ve'ita Ieisu Keliso ena 'evivi mai weaqina
  - 5:12-22 Faulo ena vebibina 'ebeluo'ova 'ekalesia 'inaya
  - 5:23-28 Vona veyoluba be lukafoi
- 

## Vematamagilafu be lukaiwa

**1** <sup>1a</sup> Leta ba'e ya'a Faulo be Sailasa ta wese Timoti 'imega waiwai omi'a Tesalonaika ana to'ekalesiyavo 'imia. Omi'a Tamada Yaubada ta wese eda Kaiwabu Ieisu Keliso edi tomotauyavo. Avevenoqi weaqimi veyoluba ta wese nuadaumwala tuta qabuna na'eno'eno 'imia.

---

<sup>a</sup> 1:1 Via 17:1

### To'ekalesiyavo edi vetumaqana be edi ilivu weaqina

<sup>2</sup>Tuta qabuna avevenoqi weaqimi Yaubada 'inaya, ta ema venoqi~nana 'inaya ge ada lua'u lukaiwa weaqimi. <sup>3</sup><sup>b</sup> Ta tuta~nana avevenoqi weaqimi Yaubada matanaya 'inega emi fewa emi vetumaqana vuaqina 'inega be, emi viaqayavo veyolubega ta wese ma'oda emi lu'ita vane Iesu ena 'evivi mai weaqina okafi'i'ihia anuanua ve'avinia.

<sup>4</sup>Emavo, ni'a ahalamania omi'a Yaubada tawa veyolubemi ta wese venua'ivinimi ena tomotauyavo 'idewani. <sup>5</sup><sup>c</sup> Mana tuta~nana Vale Aqiaqina amiea 'imia ge ema vona namo 'inega Vale~nana oda 'ewei, ta 'esi wese Niboana Gwalagwalana ena waiwaiega, e 'inega Vale~nana o'awahaqiaqiea. Ta wese ema veilivu aqiaqi 'imia ni'a o'itedi, ta ba'e ilivu diavona 'idiega ni'a oalamanian vona diavona vonahaqiaqi. <sup>6</sup><sup>d</sup> Vonahaqiaqi, tuta~nana Vale~nana o'ewea 'inega wese vaina vita maega olobedi, ta Vale~nana Niboana Gwalagwalana ena qaiawa 'inega o'ewea, e ba'e 'inega ima'a be wese eda Kaiwabu ovetutumema. <sup>7</sup>E ba'e ilivu~nana 'inega omi'a ove'ebe'ita aqiaqi Keliso ana to'abibodayavo itoatoa di'we Masidonia be Akaya 'idia. <sup>8</sup>Vonahaqiaqi, eda Kaiwabu Valena tawa 'imiege veqidua di'we Masidonia be Akaya 'idia, ta wese omi'a emi vetumaqana Yaubada 'inaya Valena ni'a ve'ena'i di'we qabuna 'idia. 'Inegana todi'we 'inaya atautauya ge wese taha tola'ai tomotau ada vonedi emi vetumaqana weaqina, mana vale~nana ni'a inoqolia. <sup>9</sup>Ta taudiege isimasimana ma'oda omi'a lova o'ebe'ewa 'aiqema, ta wese ma'oda onuagivila 'aiqa emi tokwalui adi iwa'odu 'idiega, ta 'esi Yaubada mayawaina ta aqiaqina 'inaya oawafelemi ta ovetofewa weaqina. <sup>10</sup>Ta wese isimasimana emi lututa Yaubada Natuna Iesu ena 'evivi mai mahalega weaqina, tauna Yaubada giveya'itoto 'eviviea 'aligege. E ba'e Iesu~nana nawale na'etoyavuida Yaubada ena gamohoqala 'inega.

### Faulo lova ena fewa Tesalonaika 'inaya

**2** <sup>1-2</sup><sup>e</sup> Taimavo be novumavo, ni'a oalamanian lova me Filifai iveilivu veifema ta wese i'awaluveifema, 'inega vita qidwana alobea 'abaga~nana 'inaya. 'Inega Filifai anogei ta awai omi'a me Tesalonaika sabi vayausimi. Ta emi 'abaga 'inaya wese vevoalana alobea. Ta tua Yaubada giwalima givefatuya 'inega Iesu Valena alugaihiea 'imia. Ta omi'a vuaqa aqiaqina ni'a alobea vayausa~nana 'inega. <sup>3</sup>Mana Vale~nana aneimi ge taha ena luveifamo be ge taha u'ava ta ge wese venuana magilafu maega.

<sup>b</sup> 1:3 1Kol 13:13; Kol 1:4-6    <sup>c</sup> 1:5 1Kol 2:4-5    <sup>d</sup> 1:6 Via 17:5-9    <sup>e</sup> 2:1-2 Via 16:19-24; 17:1-9

<sup>4f</sup> Vonahaqiaqi, Yaubada ema fewa ba'e weaqina 'awahaqiaqiema, 'inega avetovaletuyana weaqina be Vale Aqiaqina asimana 'ifoqeyea 'imia. Ta ema simana ge tomotau edi nuanua 'inega, ta 'esi Yaubada ena nuenuega. Mana Yaubada ema nuanuayavo giwalimaya ni'a alamanidi 'eguma aqiaqidi nage luveifadi. <sup>5</sup>Ta wese ni'a oalamanida ge vona yafayafadi 'inega ada lugaihi 'imia emi nuagivila weaqina. Ta wese Yaubada ni'a alamanida ge vegegediega ada veiaianemi emi kulufayavo sabi 'ewadi. <sup>6</sup>Ta ema viaqayavo 'imia ta wese mali qabu 'idia ge tauma ama awatubo weaqina ada viaqidi. Vonahaqiaqi, ima'a Keliso ena tovaletuyanayavo luaqiaqiema be ada vetoluvine 'imia, ta ge ada viaqia. <sup>7</sup>Ta 'esi ima'a me ema nuawebui awai 'imia kavona taha vavine natudi i'ita'itamakia. <sup>8</sup>Omi'a nuama o'ewea qiduana, 'inega Iesu Valena anemi, ta wese taumega ahawafelema 'imia.

<sup>9g</sup> Emavo, ona nuave'avinia lova omi'a maega katoatoa ta Iesu Valena alugaihiea 'imia. Ta ge taha vita ada neimi ama 'itamaki weaqina, 'inega 'aubena be velovelovana qabuna 'idia afewa qiduana be taumega ave'ainima. <sup>10</sup>Omi'a taumiega ema ilivu ni'a oalahalamanidi, ta wese Yaubada alamani aqiaqiedi, mana ima'a simasimalima ta tunutunuqima ta ge wese taha ema luveifamo. <sup>11 h</sup> Ta ni'a oalamanida tomotau qabumi a'itamakimi 'idewani taha tama natunavo 'ita'itamaki aqiaqiedi. <sup>12</sup>'Inega alugaihimi be avona iulemi ta wese avenoqiemi ona veilivu aqiaqi be yaqisa Yaubada na'awahaqiaqiemi, mana ni'a vena'ivinemi tauna ena 'Ebeluvine 'inaya ona lugu ta ena simatala qiduana ona 'itea.

<sup>13 i</sup> Emavo, tuta qabuna alulukaiwa Yaubada 'inaya, mana tuta~nana ena vona alugaihiea 'imia e 'inega vona~nana 'inaya oawafelemi. Ta vona~nana o'awahaqiaqiea Yaubada 'inega mai, ta ge tomotau 'idiega. Vonahaqiaqi, ba'e Yaubada ena vona, ta omi'a tovetumaqana vona~nana ena waiwai ni'a olutonovia. <sup>14 j</sup> Ta omi'a toa vitana olobea emi vetumaqana weaqina, 'idewani taudi Iesu Keliso ana tovetumaqanayavo di'we Iudia 'inaya itoatoa vita~nana wese ilobe. Mana to'ekalesia diavona vevoalana ilobe. Ta tomotauyavo me Diu 'idega, 'idewani omi'a wese vevoalana olobea emi tomotauyavo 'idiega emi vetumaqana weaqina. <sup>15 k</sup> Mana taudi me Diu lova Yaubada ena tovesimanasimanayavo iluve'aligidi, ta wese eda Kaiwabu Iesu iveilivu veifea ta iluve'aligia, ta ba'itagana ima'a wese ivevoalanema ta ilu'wavinima. Ta wese tomotau qabudi ivevoalanedi 'inega Yaubada ge daqaiawa edi ilivuyavo weaqidi. <sup>16</sup>Ta wese me Diu nuanuadi ema lugaihi taudi ge me Diu 'idia ina givelua'uya, mana ge nuanuadi mali qabu 'etoyavua ina lobei Yaubada ena gamosoala 'inega. 'Inega edi luveifanayavo veqidua otaqa ta Yaubada ena gamosoala ni'a ilobe.

<sup>f</sup> 2:4 Gal 1:10   <sup>g</sup> 2:9 Via 20:34   <sup>h</sup> 2:11-12 Via 20:31   <sup>i</sup> 2:13 2Te 2:13   <sup>j</sup> 2:14 Via 17:5

<sup>k</sup> 2:15 Via 9:23,29; 13:45,50; 14:2,5,19

**Faulo nuanuana navayausa 'eviviedi**

<sup>17</sup>Emavo, lova anogemi ta tuta qabuna a'ala'alanuaiemi, 'inega ge tuta kuena ema tauya 'abibodanaya nuanuama ada 'ita 'eviviami.

<sup>18</sup>Vonahaqiaqi, nuanuama ada wai 'evivi sabi 'itami, 'inega ya'a Faulo yavetafe'wa waiwai vonigo eda wai, ta ge agu fata mana Seitani ema 'eda gibodea.

<sup>19</sup><sup>1</sup>Omi'a ema 'ebeluta vane ta wese ema 'ebeqaiawa 'iudi. Ta wese omi'a ema 'ebe'asima'ala tuta~nana kana tovololo eda Kaiwabu leisu matanaya ena 'evivi mai 'inaya. <sup>20</sup>Vonahaqiaqi, awatubo be qaiawa weaqimi ana lobe.

**3** <sup>1-2</sup><sup>m</sup> Tuta kuena 'inaya nuanuama be ada vayausimi, ta ge ana fata be ada wai 'imia. Ta wese valemi ge ada noqoli, 'inega giwalima a'ala weaqimi. E 'inega taida Timoti avetunea wai sabi 'itami, ta ya'a be Sailasa ba'ade 'abaga qiduana Ateni 'inaya atoa. Taida~nana maega Yaubada weaqina afewafewa 'aidega Keliso Valena ana vetalasimasimana weaqina. Ta ena wai~nana 'iuna mana nuanuama navona iulemi, be wese sabi givefa'alimi emi vetumaqana Keliso 'inaya weaqina. <sup>3</sup><sup>n</sup> Ta wese wai 'imia be yaqisa emi vetumaqana~nana ge nadawalili tuta vitana 'idia. Ta ni'a oalamani aqiaqiea ita'a tovetumaqana vita diavona kana lobedi ta wese kana vebaedi. <sup>4</sup>Ta ona nuai lova ima'a maega katoatoa amaduvonemi ba'e vita diavona ina 'ifoqe 'imia, ta ba'itagana vona~nana ana aqiaqi ni'a o'itea ta ovebaedi.

<sup>5</sup>E ba'e vita diavona weaqidi yanuanua qiduana, 'inega Timoti yavetunei wai ta emi vetumaqana nahalamaniana ta valena namiea 'iguya. Mana giwaligu a'ala Seitani ena sitonovayavo 'inega nage ni'a odawalili ta ema vetafe'wa weaqimi daveyani kavokavovo. <sup>6</sup><sup>o</sup> Ta Timoti ni'a 'evivi mai 'imiega ta valemi aqiaqina neima vonaya vonigo omi'a me Tesalonaika me emi vetumaqana waiwaina Keliso 'inaya otoatoa ta wese veyoluba 'avami. Ta wese vematamagilafuyema tuta qabuna ema vayausa nugwenugweina o'ala'alanuaiema, ta wese vematamagilafuyema nuanuami ona 'ita 'eviviea 'idewani ima'a wese nuanuama ana 'itemi.

<sup>7</sup><sup>p</sup> Emavo, ima'a wese vita be vevoalana ni'a alutonovia, ta tuta~nana emi vetumaqana Keliso 'inaya valena anoqolia 'inega giwalima 'eta'ia ta wese aqaiawa qiduana. <sup>8</sup>Vona aqiaqi, emi tovololo'ita Keliso 'inaya weaqina ama luttonova ni'a veaqiaqi.

<sup>9</sup>Inega Yaubada 'inaya ema lukaiwa weaqimi ge ana fata be ana givelua'ui, mana omi'a weaqimi Yaubada matanaya aqaiqaiawa gegoyo. <sup>10</sup>Inega 'aubena be velovelovana qabuna 'idia avevenoqi waiwai vonigo

<sup>1</sup> 2:19 Fil 2:15-16; 4:1; 2Te 1:4    <sup>m</sup> 3:1-2 Via 17:15; Via 16:1-3    <sup>n</sup> 3:3 2Tim 3:12

<sup>o</sup> 3:6 Via 18:5    <sup>p</sup> 3:7 2Te 1:4

ana 'ita 'eviviami, be 'eguma emi vetumaqana nawale ge davewaiwai otaqa, e 'inega nuanuama ana iulemi be yaqisa vetumaqana~nana naluveagatuna'imi.

<sup>11</sup> 'Inega avevenoqi Tamada Yaubada be wese eda Kaiwabu Ieisu 'idia ema 'eda ina siwa'ea 'inega ana fata ana vawayusimi. <sup>12</sup> Ta wese avevenoqi Yaubada 'inaya vonigo eda Kaiwabu emi veyoluba nagive'ena'ia be na'afwataiwaqa omi'a weaqimi ta wese tomotau qabudi weaqidi, 'idewani ima'a ema veyoluba weaqimi 'afwa'afwataiwaqa. <sup>13</sup> E ba'e 'inega Keliso giwalimi nagivewaiwaiiedi be yaqisa ami fata ona tovolu Tamada Yaubada matanaya ge ami 'ebeve'ewamo, ta 'esi vunavunaqa otaqimi ona toatoa tuta~nana eda Kaiwabu Ieisu na'evivi namai ena tomotauyavo gwalagwaladi maega.

### Yaubada kana giveqaiawe a ilivu aqiaqina 'inega

**4** <sup>1</sup> Emavo, wese taha yani qiduana weaqina ana vematamagilafuyemi. Eda Kaiwabu Ieisu ana wawega avona waiwai 'imia emi ilivu aqiaqina 'inega ona toatoa, be yaqisa Yaubada naqaiawa weaqimi. Lova yani diavona weaqidi ni'a ave'itemi, ta ahalamania ilivu aqiaqidi oviaviaqidi. Ta ba'itagana agivenua'i'ihimi ilivu diavona ona givetomanedi. <sup>2</sup> Mana ema ve'itayavo lova eda Kaiwabu Ieisu ana wawega aneimi ni'a oalamani aqiaqiedi.

<sup>3</sup> Yaubada nuanuana taumiega ona vegwalemi, 'inega ge taha velamo'eno kavokavovo ona viaqi. <sup>4</sup> 'Inega qabumi ami fata 'wafimi ona 'itamaki aqiaqiedi tuta~nana sitonova taha taha ona lobedi, ta me emi ilivu vunavunaqina ona toatoa 'inega tomotau ina 'awahaqiaqiem. <sup>5</sup> Ta gebu me emi nuagovaqa 'idewana taudi ge ida tafwalolo, mana Yaubada ena 'eda ge ida alamania. <sup>6</sup> 'Inega omi'a to'ekalesiayavo ge taha toga 'imiega ana luaqiaqi be iana moqanena maega ina 'eno, fole Yaubada ena luvematasabu nalobei ilivu~nana weaqina. E ba'e ilivu~nana weaqina lova vona waiwai ni'au amaduneimi. <sup>7</sup> Mana Yaubada ge davenua'ivineda ilivu bwavubwavudi adi viaqa weaqina, ta 'esi ilivu vunavunaqina weaqina. <sup>8</sup> Ta 'eguma taha toga ba'e ve'ita diavona nanogedi 'inega tauna ge tomotau edi luvine dabwegei, ta 'esi Yaubada ena luvine, tauna Niboana Gwalagwalana neinei kavovomi.

<sup>9</sup> Emavo, egu leta ba'e 'inaya ge ena ve'itemi omi'a tovetumaqana ma'oda ma emiavo ona veyoluba 'aiqemi, mana ba'e veyoluba~nana weaqina Yaubada taunega ni'au ve'itemi. <sup>10</sup> Vonahaqiaqi, Yaubada ena tomotauyavo qabudi di'we Masidonia gamonaya itoatoa ni'a oveveylubedi, ta nuanuama qiduana veyoluba~nana 'idia ona

¶ 4:3 1Te 5:23; 1Fit 1:16 ¶ 4:4-5 1Kol 6:13 § 4:7 1Fit 1:15-16; Ibe 12:14 ¶ 4:8 Lk 10:16; 2Kol 1:22 ¶ 4:9 Ion 13:34

luvetomania. <sup>11</sup> Ta emi nuanuayavo ona a'udi yani toi 'idia, e ba'e: Me emi ilivu nuvana ona totoa be, tomotau 'wafidi ge ona givesiniqaiqaiedi, ta wese taumiega ona fewa emi toa weaqina, 'idewani lova ni'a avonemi. <sup>12</sup> Inega taudi Keliso ge ida vetumaqanea emi ilivu aqiaqina 'inega ina 'amayabemi. Ta omi'a ami iula weaqina gebu mali tomotau 'idia ona vetumaqana, mana taumiega ni'a oveveiuula.

### Eda Kaiwabu ena 'evivi mai weaqina

<sup>13</sup> Emavo, nuanuama ona alamani aqiaqiea tola'ai nawale na'ifoqe taudi tovetumaqana aqiaqi 'ali'aligidi 'idia, be yaqisa ge ona nuavita 'idewani taudi ge ida vetumaqana to'aliga edi ya'itoto 'evivi 'inaya. <sup>14</sup> It'a kavetumaqana Iesu 'aligege ni'a ya'itoto 'evivi, 'inega wese kavetumaqana taudi edavo tovetumaqana ni'a i'aliga nawale Yaubada 'aligege nagiveya'itoto 'eviviedi tuta~nana Iesu na'evivi namai bwa'obwa'oya. <sup>15</sup> Ta tola'ai ba'itagana aveve'itemi lova wese 'idewana Iesu ve'itema. Ta ve'ita~nana ana alamani ba'e: Iesu ena 'evivi mai ana 'aubena 'inaya ita'a mayawaida bwa'obwa'o 'inega ge kana madutauya debanaya, ta 'esi taudi 'ali'aligidi ina nugweta. <sup>16</sup> Mana eda Kaiwabu taha vona qiduana nanoqolia Yaubada ena tovale'ewayavo adi tovanugweta ena gaba 'inega, ta tutana 'inaya Kaiwabu taunega nawebui mai mahalega. Ta wese Yaubada bea namu'ea, 'inega Keliso ana tovetumaqanayavo 'ali'aligidi ina maduya'itoto deba'unuyega. <sup>17</sup> Ta 'abiboda ita'a mayawaida taudi maega kana va'auta gawataya, ta oade 'inaya Iesu maega kana vellobaloba, 'inega tuta vataya tauna maega kana totoa. <sup>18</sup> Inegana vona ba'e 'idiega ma emiavo taumiega ona vona iulemi ta ona givewaiwaiemi.

### Kana 'iva'ava'aida eda Kaiwabu ena 'evivi mai weaqina

**5** <sup>1</sup> Emavo, ge daluaqiaqiema be leta ba'e 'inega ana vematamagilafuyemi Iesu ena 'evivi mai ana 'aubena weaqina, <sup>2</sup> mana ni'a oalamani aqiaqiea eda Kaiwabu ena mai ana 'aubena naluveafeda 'idewani tovanawala edi mai velovelovana 'inaya. <sup>3</sup> Vonahaqiaqi, tuta~nana tomotau ina vonaya, "Eda toa aqiaqi otaqina, ge taha tola'ai weaqina kana mwaniniva." E 'inega veilage qiduana naluveafedi navunuqidi 'idewani visiq qiduana vavine gamwegamwe'idi naluveafedi sabi venatuna. Ta veilage~nana 'inega totoa velovelovana ge taha toga 'idiega ana fata nadena.

<sup>4</sup> Ta emavo, omi'a ge velovelovana ana totoa, e 'inega eda Kaiwabu ena 'aubena ge wese naluveafemi kavona tovanawala ena mai 'idewani. <sup>5</sup> Omi'a qabumi simatala ana totoayavo ta wese 'aubena ana totoayavo.

<sup>v</sup> 4:11 Efe 4:28    <sup>w</sup> 4:14 Lom 14:9; 1Kol 15:3-4,12    <sup>x</sup> 4:15-16 1Kol 15:51-52

<sup>y</sup> 5:2 Md 24:42-43; 2Fit 3:10; Ve 3:3    <sup>z</sup> 5:3 Md 24:39; Lk 21:34-35    <sup>a</sup> 5:5 Lom 13:12

Ita'a tovetumaqana gebu velovelovana ana qabuyavo, 'inega ge nuanuada velovelovana ana ilivuyavo kana viaviaqidi. <sup>6</sup>'Inega kana 'itamaki aqiaqieda, ta ge kana 'eno motaiva vaidi tomotau 'idewani. Ta 'esi me eda 'iva'ava'ata be wese me eda nuanua tunutunuqidi kana toatoa, <sup>7</sup>mana to'eno velovelovana 'inaya i'eno'eno, ta wese go'ila waiwaina ana tonuma velovelovana 'inaya inumanuma 'inega ivekwavakwava. <sup>8</sup><sup>b</sup> Ta ita'a 'aubena ana totoayavo luaqiaqieda be taudega kana 'itamakida. 'Inega veyoluba be vetumaqana eda 'ebevebaba, ta wese ni'a kalamania 'etoyavua kana lobeia Keliso 'inega, ta 'etoyavua~nana 'inega 'unu'unuda kana 'aubwaea. <sup>9</sup>Mana Yaubada ge davenua'ivinida be ena gamohoqala naguiwaqa webuiei 'idaya, ta 'esi venua'ivineda be 'etoyavua kana lobeia eda Kaiwabu Iesu Keliso 'inega. <sup>10</sup><sup>c</sup> Vonahaqiaqi, tauna 'aliga weaqida, 'inega ge taha tola'ai 'eguma 'ali'aligida nage mayawaida katoatoa tuta~nana na'evivi namai, mana 'aliga~nana 'inega 'etoyavuida be yaqisa tauna maega kana toatoa. <sup>11</sup>'Inega taumi ma emiavo ona vona iulemi be wese ona givewaiwaiemi, 'idewani ba'itagana ni'a oviaviaqia.

#### Faulo ena nuanua ana 'ebelu'ovoa

<sup>12</sup>Emavo, nuanuama qiduana omi'a to'ekalesia ami tovanugwetayavo ona 'amayabedi. Taudi eda Kaiwabu Iesu venua'ivinidi ta ena fewa iviaviaqidi, ta omi'a tovetumaqana emi ilivu aqiaqina tuta qabuna ilulugaihimi. <sup>13</sup>Ta edi fewa qiduana weaqina ona givaneyedi be ona veyoluba aqiaqiedi. Ta omi'a to'ekalesia ge ona vedavi, ta 'esi taumi ma emiavo ona toadaumwala tuta qabuna. <sup>14</sup><sup>d</sup> Emavo, avevematamagilafuyemi tovegwavu'ai ona lugaihidi ge ina toa kavokavovo, ta 'esi ina fewafewa, ta tomwaninivayavo giwalidi ona givfatuya, ta todawalili ona iuledi. Ta ona awafelemi be ona vetofewa tomotau qabudi 'idia. Ta omi'a taumi ma emiavo ona bibitaqomi. <sup>15</sup><sup>e</sup> Ta 'eguma vaidi tomotau ina veilivu veifemi 'inega ge wese ona ve'iedi, ta 'esi tuta qabuna ma emiavo ta wese mali tomotau maega ona veilivu aqiaqiemi.

<sup>16</sup><sup>f</sup> Tuta qabuna me emi qaiawa ona toatoa. <sup>17</sup>Ta tuta qabuna ona vevenoqi! <sup>18</sup><sup>g</sup> Ta 'eguma tuta aqiaqina nage vitana, ta tua tuta qabuna ona lukaiwa Yaubada 'inaya. Ba'e ena nuanua, mana omi'a Keliso ena tomotauyavo.

<sup>19</sup><sup>h</sup> Niboana Gwalagwalana ena fewa ge ona givelua'ui. <sup>20</sup>Ta 'eguma taha toga natovolo navonaya, "Niboana Gwalagwalana ena vona ba'e." E 'inega vona~nana ge ona veyani kavokavoyei, <sup>21</sup><sup>i</sup> ta 'esi vona~nana

<sup>b</sup> 5:8 Ais 59:17; Efe 6:14,17    <sup>c</sup> 5:10 Lom 14:8-9; 1Te 4:14    <sup>d</sup> 5:14 2Te 3:6,11

<sup>e</sup> 5:15 Lom 12:17; 1Fit 3:9    <sup>f</sup> 5:16 Fil 4:4    <sup>g</sup> 5:18 Efe 5:20    <sup>h</sup> 5:19 Efe 4:30

<sup>i</sup> 5:21-22 1Ion 4:1

ona lutonova aqiaqiea ta Yaubada ena vona maega ona giveleleqea, ta 'eguma aqiaqina e 'inega ona kafi'i'ihia. <sup>22</sup>'Inega yani qabuna luveifadi ona nogedi.

### Vona veyoluba be lukafoi

<sup>23j</sup> Egu nuanua qiduana toadaumwala ana Yaubada taunega emi ilivu qabuna 'idia nagivegwalemi. Ta yavevenoqi weaqimi niboanimi be emi nuanua ta wese du'umi qabuna ona 'itamaki aqiaqiedi, 'inega ge taha ami 'ebeve'ewamo tuta~nana eda Kaiwabu Iesu Keliso na'evivi namai. <sup>24</sup>Yaubada ni'a venua'ivinimi, e 'inega ona vetumaqanea be yani diavona ana fata naviaqidi weaqimi.

<sup>25k</sup> Emavo, nuanuama ona venoqi weaqima.

<sup>26</sup>Tuta~nana emiavo tovetumaqana maega ona va'auta e 'inega venima sibutuyega ona lulukaiwa 'idia.

<sup>27</sup>Eda Kaiwabu ana wawega yaluvini leti ba'e ona avoya edavo tovetumaqana qabudi 'iawadia.

<sup>28</sup>Avevenoqi weaqimi eda Kaiwabu Iesu Keliso ena veyoluba omi'a qabumi maega.

---

<sup>j</sup> 5:23 2Te 3:3    <sup>k</sup> 5:25 Kol 4:3; 2Te 3:1